



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

f Tir Yimyim

Instagram tiryimyim@aolima

YouTube tir yimyim

TAPAK 9

**NEEPCO nung independent director  
ama Bimal Oswal shimogo**

**MLA Yangseo-i Kiphire nung 'Feed  
Making Unit' lapoktsüogo**



**VOL. XIX NO. 36 (ADOK 36) DIMAPUR KÜPTOKNÜ (SATURDAY)**

**YIMPOKSÜI (NOVEMBER) 13, 2021**

**₹ 5.00**

## DPC Tir Filip Wotsa asüba atema mangyimer



**Dimapur, November 12, 2021 (TYO) :** D i m a p u r Press Club (DPC) Tir aser The M o r u n g

Express nung senior reporter, Filip Wotsa Hokolbarnep alima nungi pilaogo. Pa arishi küm 38 liasü aser pai pa kinungtsü aser jala toktsür asü.

Taküm September ita pa gari lendong ka nung tekolak yiru aser iba sülen nija mozü ki ka nung tekolok surgery asemen tashi agia ICU nung anepalua aru. Ajsiüaka, tanep züngia pai iba akümüli toktsür ogo.

Tanü anüngdang 12:00 ako nung Riverbelt colony nung par kidang pa den asüpila sentep agi aser iba sentong nung nisung noklang aika adenshia liasü.

"November 12 nü DPC tir aser medemer tajung Filip Wotsa asüba osang angashia züngsem ajak temolung raksar. Iba ama tejashi mapang nung DPC-i asür kibong aser kinungertem den asükhu lemsateper aser pa mang ayimer" ta DPC-i sangdong ka nung metetdaksü.

"Asür Filip Wotsa ya journalist tajung ka liasü. Pa lenisüba tajung sülen onoki anidak, pai onok den shisatsü lemsateper aser tensa ajak nung asayamenüa onok molung sangwadaktsüba menungraa bilemteter. Pai mapang ajak nung telok len aniba onoki kodanga mamatsü" ta DPC-isa ashi.

"DPC züngsem shiai pa dang nungi angazükogo aser DPC ali tashi pa onok den alitsü" ta parnokisa ashi.

"Asür Filip taküm alidang

wadang balala nung shilem agia aru aser pai temelenshi tajungtem bener aruteta shilem tajung agiogo. Onoki pa den külemi inyaksemba atema pelar aser onoki teti pa bilemtettsü, akhümtsübuttsü aser meimtsü. Pa tanüla teti anisüngzük ngudakjangma" ta DPC-i metetdaksü.

Department of Information & Public Relations, Govt of Nagaland-ia sangdong ka ajanga Filip Wotsa asüba osang angashia temolung raksaba metetdaksüogo.

"Filip ya Journalist teyakyak ka liasü aser Nagaland nung journalism ajungketba nung shilem tajung agiogo. Nagaland nung media pur atema pai teti yakbang ser inyak. Pai toktsür aoba kinungtsü, jala aser kinungertem den asükhu aser mangyim lemsateper" ta Director, IPR, Er. Z. Tokishe Sema-i ashi.

Commissioner of Police, Dimapur Rothihu Tetseo-ia sangdong ka nung Filip Wotsa asüba osang angashia temolung raksaba metetdaksü.

"Pa ya Nagaland nung senior journalist ka liasü aser Naga Civil Society nung shilem tajung agiogo. Ni asür kibong aser kinungertem den mangyim lemsateper aser Tulusang Tsüngremi sünepjang ta sarasademer" ta Rothihu Tetseo-i ashi.

Kohima Press Club (KPC), Mokokchung Press Club (MPC) aser Nagaland Press Association (NPA) teloktemia sangdong balala nung senior journalist aser Dimapur Press Club tir Filip Sumi asüba osang angashia temolung raksaba aser mangyimba osangtem metetdaksüogo.

## COVID-19 Nagaland: 6 dak putet & 12 taneptsü angu

**Kohima, November 12, 2021 (TYO) :** Nagaland nung Hokolbarü nisung 6 dak COVID-19 putet aser 12 taneptsü angu.

"Tanü putetertemji Kohima nung nisung 4 aser Dimapur nung 3 lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Taoba ghonda 24 tsüngda COVID-19 puteta alir nisung 12 taneptsü angu. Parnokji Dimapur nung 7, Kohima nung 3 aser Mokokchung o Phek nung kaka (1) lir" ta pai ashi.

Nisung 31,973 rongnungi 30,064 taneptsü nguogo aser ibaji taneptsü angur 94.02% lir, ta Dr Kikon-i shisem.

Tang nisung 167 anepaludar saka parnok 136 dakbo shirangba

yimya kecha mali, ta pai ashi.

"Brihostibar tashi nung nisung 716,309 nem COVID-19 vaccine indang dose 12,31,548 agütsüogo" ta State Immunization Officer, Dr Ritu Thurr-i ashi.

Vaccine agirtemji frontline workers 60,965, healthcare workers 15,998, arishi küm 45 ser tempur 203,370 aser arishi küm 18 nungi 44 tsüngda alir 435,976 lir, ta paisa ashi.

"Vaccine agirtem rongnung nisung 515,239-i dose anaprong agiogo. Parnokji frontline workers 48,166, healthcare workers 13,460, arishi küm 45 ser tempur 165,771 aser arishi küm 18 nungi 44 tsüngda alir 287,842 lir" ta Dr Thurr-isa metetdaksü.

## CM Rio-i CISHR nung Acute Care Hospital Block lapoktsü



November 12, 2021 nü Nagaland Chief Minister Neiphiu Rio-i Christian Institute of Health Sciences and Research (CIHSR), Dimapur nung Acute Care Hospital Block lapoktsüdang agiba noksa angur.

**Dimapur, November 12, 2021 (TYO) :** Nagaland Chief Minister Neiphiu Rio-i Hokolbarü Christian Institute of Health Sciences and Research (CIHSR), Dimapur nung Acute Care Hospital Block lapoktsüogo.

"Iba Block ajanga shirangertem aser talisa sensakertem nem healthcare services tajung agütsütsü. CIHSR nung yipden talila

akümba ya Nagaland atema dang masü saka asenok anasa aliba state tem nungi nübertem ajangzüksü" ta Chief Minister Rio-i tanü metetdaksü.

"Glocal Healthcare Systems Private Limited Kolkata-i mapang tatsüka tsüngda yipden 200 aliba mozü ki yanglutsüba atema Nagaland nung alir ajak tenung nung pelaba metetdaksür" ta CM Rio-isa ashi.

COVID-19 wara tanabuba tenzükba sülen CIHSR, Dimapur nung iba Block yanglutsü lemteta liasü. Yipden 200 aliba acute care hospital nung yipden 24 indang Pediatric ICU ward lir aser iba ya sen crore 30 endoka yanglu.

Tanü agiba sentong nung Deputy Chief Minister, Y Patton aser Health & Family Welfare Minister, Pangnyu Phom natia o jembia liasü.

## Covid nungi jenbua alitsü atema vaccine agitsüla: Kohima DTF

**Dimapur, November 12, 2021 (TYO) :** Covid anema rara nung vaccine agiba ajanga dang taküm kümzükttetsü ta tanü Kohima District Task Force (DTF)-i metetdaksü.

November 12, 2021 nü Kohima District Task Force (DTF) on COVID-19 Vaccination-i Kohima district nung tamangba yimsü dak sendakba teloktem den külem senden ka menogo.

Senden nung PWD (Housing & Mechanical) Minister aser Kohima district on COVID-19 incharge Tongpang Ozukum, Urban Development and Municipal Affairs Advisor Dr. Neikiesalie Nicky Kire aser Technical Education and Election Advisor Medo Yhokha nungeri Covid vaccine agitsüba indang jembia.

Covid wara ajanga rongsenketzüng nung dak masü saka taküm libaliro nunga kongshiogo aser tapayutsü taküm aika laluogo, ta parnoki ashi.

Sorkar, ketdangsurtem, medical mapa inyakertem aser sendaktepa alir ajaki public kümzükta ayutsü atema anibelem

arema inyaka arur saka public-i amalitep maliba ajanga 100% vaccination alizüng metongteter, ta parnokisa tebilemstü lemsatep.

Covid wara tenzükba nungi tanü tashi raraan aruba mapa nung arogoi tongti shilem agir aser iba atema pelar aser ano maneni arogo teyari nungdaker ta MLA temi senden nung ashi.

Parnokisa tamangba yimsü dak sendakba teloktem dang pei pei sabang nung osang sangoktsütsü aser nübertem dang vaccine agiba tajangzük ashitsüla, kechiyong Covid anema raraba nung vaccine ajanga dang taküm kümzükttetsü ta ayongzük.

Kohima ya state yimtiba asünung sensotemi tanüngba district temi angazüksüsa shia metetba sayutsüla, ta MLA temisa metetdaksü.

Senden nung CMO Kohima, Dr. Vezokholu Theyo-i Power Point presentation ka ajanga Kohima district nung Covid-19 mapa inyakba osang metetdaksü.

Kohima nung November 8, 2021 nungi "Har Ghar Dastak campaign" tenzükogo aser iba ya November 30, 2021 tashi agitsü

ta laisa ashi.

"Iba campaign ya COVID vaccine agitsüba maparen tuluba nung inyaktsü aser vaccine agitsüpurtem jangjashitsü atema tenzükba agir. Anungji mezüng dose magirtem aser tanabuba dose agitsü mapang süir ajaki iba campaign nung shilem agitsü mepishir" ta Dr. Vezokholu-isa metetdaksü.

MS NHAK, Dr. Sendimeren Aonok-ia Covid vaccine ajanga mapa inyakba osang lemsatepdang "Covid wara tanabuba nung NHAK nung nisung 79 asü aser parnok rongnung nisung ka dang dose anaprong agir liasü" ta ashi.

Temang nung tashidak balala aketer aika dak Covid puteter ICU, NHAK nung anepalu saka parnok vaccine dose anaprong agir aliba ajanga anogo asem mesüra pezü tsüngda taneptsü angu, ta paisa ashi.

"Covid ajanga timtem tulu magütsüdaksütsü atema vaccine agir. Anungji iba senden nung adener ajaki nübertem dang vaccine agitsü osang sangokjang aser Kohima nung iba wara agiendi" ta Dr. Sendimeren-i mepishia metetdaksü.

## Mokokchung nung lendong mela ajurutsüba tesemtem jangjatep



Vitolu Chishi, EAC HQ. Mokokchung aser Traffic OC Mokokchung, Talimayang Jamir nati anir survey team kati November 12, 2021 nü Mokokchung jila kübok lendong mela ajurutsüba tesemtem semdanga jajaba mapang tangokba noksa ka yangi angur.

**Dimapur, Yimpoksüi/Nov. 12 (TYO):** Deputy Commissioner aser Chairman, District Road Safety Committee, Mokokchung, Limawabang Jamir-i committee pur senden ka jatepa Mokokchung jila nung lendong mela ajurutsüba tesemtem jangjatsü asoshi lungjemer survey ka agia liasü.

Iba survey team nungya Executive Er. Mokokchung Electrical Division, Executive Er. PWD (NH) Mokokchung aser BSNL Service Provider

tem liasü.

Iba survey team ya Vitolu Chishi, EAC HQ Mokokchung aser Traffic OC Mokokchung, Talimayang Jamir nati anir liasü.

Parnoki item tesemtem ya lendong mela ajurutsüba tesemtem, ta asadangteta liasü: Ungma 145.200 KM; Marepkong ward 146.400 KM; Marepkong ward near Hyundai Company 146.700 KM under NH.02; Assam rifle Camp 147.500 KM; Yimyu ward near IOC Petrol Pump 3.200 KM

NH 702; IMDH (Bridge) anasa; Near Petrol Pump Sungkomen ward 153.600 KM NH.02; Old Tuensang road junction Tzusapang 155.500 KM NH. 02.

Parnoki item tesem ajunga ya semdanga 'rights of ways' bushitsü atema jembi aser lenmang tezülen barricades inoktsü aser gari nung senzürtem yaria lendong tulu nungi kumzüksü atema tekümdangtsü 'road sign' tem inoktsü jembia liasü.

## CEO-i Dimapur nung DEO, EROs aser ketdangsürtem den senden amen

**Dimapur, Yimpoksüi/Nov. 12 (TYO):** Chief Electoral Officer, Nagaland, V. Shashank Shekhar den Chief Electoral Office, Kohima nungi ketdangsürtemi Dimapur semdanga November 11, 2021 nü Deputy Commissioner, Dimapur indang conference hall nung Dimapur District kübok District Election Officer (DEO), Electoral Registration

Officers (EROs), political party balala nungi lenirtem, civil society organisation, NGO aser BLOs tem den senden mena liasü.

Iba senden nung tang teonyakdak Electoral Roll indang Special Summary Revision maparen reprangshimba mapang Election Commission of India ajanga totuyuba agütsüba aser

yimyatem kar CEO ajanga nenshia ashi.

Kasa senden nung school aser college tem nung Electoral Literacy Club tenzüksü aser political party temi Booth Level Agents tem shimteba indanga nenshia shia liasü.

District nung Electoral Roll dak sendakba nung onük aika iba senden nung jembia liasü.

## DIPR, MPC aser KPC ajanga Asür Filip Wotsa mang ayimer

**Dimapur, Yimpoksüi/Nov. 12 (TYO):** Dimapur nung November 12, 2021 nü Filip Wotsa anojungi iba lima nungi pilaogo ta osang angazüka Department of Information & Public Relations kanga jashir, ta Director, Information & Public Relations Nagaland, Er. Z.Tokishe Sema-i sangdong ka nung lemsatep.

Filip ya osangbener tejangja nübu ka liasü, shibai pei mapa nungi kodanga jenzüka mao. Nagaland nung osang abenba maparen aintsü aser temaba jenjangi ajungkettsü asoshi pai tenzükba jenti lir. State nung osangbener ajungtsü asoshi pa teti yakbang nung nokdaka liasü, ta sangdong ajanga ashi.

Pa ya Nagaland Post nung inyaka liasü aser iba sülen tasünü tashi Morung Express nung inyaka liasü. Pa media house tem aser Department of Information & Public Relations

den sendaktepba teti bilemtettsü. Tulusang Tsüngremi pa kinungtsü, jala aser kinungertem nem molung süngzük aser tashi agüjang ta sarasademtsür, ta sangdong ajangasa ashi.

Anojungi tembar tajung aser külem osangbener Filip Wotsa, Dimapur Press Club tir asüba osang angazüka Mokokchung Press Club-i mangyim tejashi lemsateper, ta MPC tir, Limalenden Longkumer-i sangdong ka ajanga ashi.

Pa ya tangatet osangbener aser nübu tajung ka liasü, aser pa asüba ajanga tawa tuluka adokdaktsüogo, koba asungtsü kanga tasak asütsü.

Filip Wotsa'er kinunger asoshi onoki sarasademtsür aser parnok mangyim tia nung alidang Tulusang Tsüngremi tashi tasen agüjang ta sarasademtsür. Asür tanüla tesunep nung

an is ü n g z ü k j a n g m a , Mokokchung Press Club sangdong ajanga ashi.

Osangbener tejen aser Dimapur Press Club tir, Filip Sumi anojungi November 12, 2021 nü Dimapur nung asüba osang angashia temolung khurema jashir, ta Kohima Press Club tir Alice Yhoshü aser tongti zülur Atono Tsükrü Kense nati sangdong ka ajanga ashi.

Asür Filip ya tejangraba tulu aliba osangbener aser lenir ka liasü, shibai mapa inyakba ajunga nung meranga aser bendanga agütsür inyaka liasü, ta ashi.

Pa asüba ajanga Kohima Press Club asoshi külem osangbener ka kisung samaba masü saka tembar tajung ka samaogo.

Pa asüba asoshi onoki mang ayimer aser kinunger adianutem den asükhu lemsateper, ta KPC sangdong ajanga ashi.

## NCSU-i Dr. S.C. Jamir nem tenüngsang agütsü

**Dimapur, Yimpoksüi/Nov. 12 (TYO):** Lenir tejen, Dr. S.C. Jamir-i linük nung civilian award rongnung tematiba jenjang tasembuba, Padma Bhushan ngutetba atema Nagaland Contractors' & Suppliers' Union (NCSU) ajanga konang tetushi agütsür, ta NCSU sangdong ka ajanga ashi.

Nagaland nung Chief Minister pungoben inyaksang aser taoba mapang Goa, Gujarat, Maharashtra aser Odisha nung Governor aser taoba mapang MP, Union Deputy Minister for Parliament Affairs inyaksang Dr. S. Jamir ya Naga nunger yimten

yimsüsürtem rongnungi iba ama sempet angur mezüngbuba alitsü.

NCSU-i Dr. S.C. Jamir lenisüba bilemteter, shibai Nagaland Contractors & Suppliers tem yaria lenmang aisü nung takok nguogo. Tanü pai iba takok ngutetba atema onoki pa nem tenüngsang agütsür aser iba sempet yagi pai lokti asoshi mapa tajungtem inyakba sayur. Pai iba ama konang tetushi langa liasü, ta NCSU sangdong ajanga ashi.

NCSU ajanga maneni pa aser par kibong anema aliba, arishi talang moajang ta sarasademtsür, ta sangdong ajangasa ashi.

## Mokokchung nung SAANS campaign tenzükogo



Chief Medical Officer, Mokokchung den SAANS campaign tenzükba sentong nung adenertem tangokba noksa ka yangi angur.

**Dimapur, Yimpoksüi/Nov. 12 (TYO):** State kübok tanüngba district tem den külemi Mokokchung nunga SAANS campaign sentong November 12, 2021 nü Chief Medical Officer, Mokokchung indang Conference Hall nung tenzükba liasü. Iba campaign ya 2022 küm February 28 tashi alitsü.

Iba campaign tenzükba sentong tatsüka agiba mapang DR. R. Chubala Aier CMO, Mokokchung ajanga ashiba agi, SAANS campaign ya ajanga

nüburtemi Pneumonia tajungba metettsü aser iba tashidak tajungtiba nung anepalu sütettsü.

Tanur asüdag pneumonia ya tashidak tamajungtiba lir. Pneumonia tashidak nungi tanurtem PPT amshia kumzükua ayutsü, nokdangtsü aser anepalutsü nükjidong nung SAANS campaign ya tenzükker, ta lai ashi.

Iba sentong nung CMO, District Administration aser School Education Department nung inyakerkem dena liasü.

## Tanü NFHRCC shisatokden senden ka amentsü

**Dimapur, Yimpoksüi/Nov. 12 (TYO):** Nagaland Foot Hill Road Coordination Committee (NFHRCC) pur shisatokden senden ka November 13, 2021 anüngdak 1:00 ako nungi tenzükba Committee indang Base Office, Kher Mahal,

Dimapur nung amentsü, ta NFHRCC repsem zülur Chenithung Humtsoe-i sangdong ka ajanga ashi.

Anungji iba senden nung züngsem ajunga medema arua adentsü mepishir, ta sangdong ajangasa ashi.

## NEET (UG) 2021 application agütsütsü anogo atsülanger

**Dimapur, Yimpoksüi/Nov. 12 (TYO):** NEET (UG) 2021 indang application form den NEET Score Card agütsütsü atema anogo tatem ya November 17, 2021 nikongdang 5:00 ako tashi atsülanger agütsütsü, ta Directorate of Technical Education ajanga

sangdong ka nung metetdaksü. Iba application atema nüngdakba kuli kakat tem teka agi Additional Director, Directorate of Technical Education nem agütsütsü. Iba sülen form kata magizüktsü, ta sangdong ajangasa ashi.

# Meghalaya CM-i USTM nung Mahatma Gandhi indang kürakyanglu ka sayatsü



**Shillong, November 12, 2021 (Agencies):** Meghalaya chief minister Conrad Sangma-i Brihostibarnü University of Science & Technology, Meghalaya (USTM) nung Mahatma Gandhi indang kürakyanglu ka sayatsü.

National Assessment and Accreditation Council (NAAC) ajanga USTM nem North East India nung nija reju nem Grade 'A' mezüing

agütsüba tenüingsang agütsütsü atema Meghalaya CM Conrad i USTM semdanga liasü.

"USTM lenisüba aser külemi inyakba ajanga Grade 'A' ama takok tulu ngutetogo" ta pai ashi.

Iba sentong nung NESAC, department of space, government of India Director Dr SP Aggarwal aser NEHU vice chancellor Prof Prabha Kr Shukla na aden.

"Northeast nung science

& technology education aser research renlokdahtsütsü atema pai bendanga agüja inyaker" ta USTM chancellor Mahbulul Hoque-i ashi.

2030 tashi nung USTM ya world class university ka kümdahtsütsü. University kaji infrastructure ajanga masü saka research background nung ajemdaker 'world class' akümer aser onoki ibaji atongtsü" ta Mahbulul Hoque-isa metetdahtsü.

# NEEPCO nung independent director ama Bimal Oswal shimogo

**Dhubri, November 12, 2021 (Agencies):** Ato Kilonser Narendra Modi-i aniba NDA sorkari Assam indang Dhubri District nungi BJP lennir tejen Bimal Oswal ya Board of North Eastern Electric Power Corporation Limited (NEEPCO) nung independent director inyaktsü shimogo.

Ministry of Power, Government of India-i File No.14-37/43/2021-H.I (259063) ajanga agütsüba tetuyuba nung, "Articles of Association of NEEPCO indang Arlla 75 kübok agüja aliba tashi amshia, India Tir-i iba osang sangdongba anogo nungi tenzüka mesüra osang tejangja ka magütsü tashi küm asem atema Board of

NEEPCO indang Non-official Independent Director ama Bimal Oswal shimogo," ta shia lir.

"Bimal Oswal, Non-official Independent Director ama shimba ya Tir ajanga lemtet aser Association of NEEPCO indang Arlla nung anidaka India Tir ajanga temelenshi agütsütsü akok," ta kasa tetuyuba nung shia lir.

Board of NEEPCO indang senden nung adentsü atema Non-official Independent Director indang TA/DA aser sitting fee' tem Department of Public Enterprises ajanga mapang shia agütsüba tetuyuba nung anidaksü," ta sangdong shia lir.

Bimal Oswal, shiba Dhubri jila nung alir, pa ya ajaki

jangjaa aliba lokti tenzüka (social worker) nübu ka aser lower Assam nung senior BJP lennir rongnung ka asütsü.

Oswal tebu Dr Pannalal Oswal-a Dhubri district indang nungtuugu physician ka liasü aser lennir ka ama BJP atema pai bendanga agüja inyakogo.

Dr.Pannalal Oswal, shibai taoba mapang BJP candidate ka ama Dhubri Lok Sabha constituency nungi election nung shilem agia liasü, 1999 küm ULFA teloki pa pua bener ao aser tepset ama temulung melemer.

Maneni, NEEPCO indang independent director ama Bimal Oswal shimba atema BJP indang Dhubri district unit-i Ato Kilonser Modi dang pelaba lemsatetepogo.



Tripura nung urban local bodies election mapang TMC candidate tem amakba anema Tripura Trinamool Congress lennirtem aser züngsemtem Agartala nung aliba Police Headquarters mokdang lungkak aitba angur.

# Mizoram nung nisung 631 dak Covid putet

**Aizawl, November 12, 2021 (Agencies):** Mizoram nung Brihostibarnü Covid-19 puteter (531) 100 dang nungi timba tuogo.

Hokolbarnü state nung nisung 631 dak Covid-19 tashidak puteta liasü, ta state information and public relations department-i metetdahtsü.

Ajisüaka, anogo ana tashi atonga Mizoram nung iba tashidak agi nisung asüba osang mali, ta parnokisa ashi.

Tang Mizoram nung Covid-19 tashidak puteter nisung 1,27,548 kümogo aser nisung 5,838 shi anepaludar.

Brihostibarnü indang positivity rate shilem 11.11 den medemdangra Hokolbarnü tashidak puteter shilem 14.26

tashi tuogo.

Tanü COVID-19 puteter rongnung tanur 145 dena lir.

Brihostibarnü nisung 732 shi Covid-19 nungi taneptsü nguogo aser parnok züngsema nisung 1,21,254 kümogo.

Covid-19 agi shirangertem rongnung taneptsü angur shilem 95% lir aser iba tashidak agi taküm samar shilem 0.35% asütsü.

Mizoram nung sample lakh 13.62 dak tema tendangogo aser Brehostibarnü sample 4,426 tendanga liasü.

Nisung lakh 7 dak tema vaccine agiogo aser item rongnung nisung lakh 5.31 shi vaccine dose anaprongla agiogo, ta State immunisation officer Dr. Lalzawmi-i metetdahtsü.



Hokolbarnü Gauhati Medical College Hospital (GMCH) nung Assam chief minister Himanta Biswa Sarma-i COVID-19 vaccine dose tanabuba agiba angur. November 27, 2021 tashi nung Assam nung vaccine agitsüpur ajaki mezüngbuba dose agitsü atema sorkari 'Har Ghar Dastak' ta ser Covid19 vaccination drive ka tenzüka agir. (Guwahati, November 12)

# Manipur nung mejangjatetba tashidak ajanga jang 250 tema asü

**Guwahati, November 12, 2021 (Agencies):** Taoba ita ka tsünga Manipur kübok Ukhrul district nung Asiatic buffalos (jang) 250 tashi süogo.

Iba atema Veterinary & Horticulture department ketdangsürtem kanga ratar.

Wahong, New Tusom, Tusom CV, Tusom Khullen, Kharasom aser Razai Khullen yimtem nung Asiatic water buffalo asüba osangtem angashiogo.

Iba ya ataloker ita ka tema süiaka ketdangsürtemi

tashidak meputet lir.

"Veterinary and Animal Husbandry department-i yimtem nung kiset shiruru metsüba dak sendakba nung tesayubatem agütsütsül" ta Northern Raphei Students' Union (NRSU) tanishir Joy Horam-i ashi.

Taküm October nunga Northern Raphei Students' Union-i Ukhrul district kübok New Tusom aser Wahong yimtem nung Asiatic buffalo 50 shi asüba atema tebilemtsü abenba metetdakja liasü.

# Guwahati nung putir ka tepseter lia angu

**Guwahati, November 12, 2021 (Agencies):** Assam kübok Guwahati nung aliba Kali Temple nung putir ka tepseta lia angu.

Iba putirsang ya Narayan Chakrabarty liasü. Pa Railway colony indang quarter nung tepseter aliba ngua liasü.

Iba ya Brihostibar aonung tesü Paltan Bazaar kübok Kalibari nung atalokba liasü.

Sanjiv Choudhury ta ser nisung ka indang quarter nung tasü mangji angu.

Narayan Chakrabarty dak ya tekolak nung langka kati yirutsür tepsetba ama temulung malemer.

Latalis police station nungi ketdangsürtem tesem tonga oa bushisüngdang ka tenzükogo saka tang tashi kuli kechia mengutet lir.



## TIR YIMYIM YIMOBILEM (EDITORIAL)

DIMAPUR KÜPTOKNÜ YIMPOKSÜI 13, 2021

### Tajung akümtsü sayuyim

**Y**akanü linük ajunga den külemi Nagaland nunga 'National Education Day' mong sentong yanglua amongba ajanga school education nung nungdakba temelenshi yakta mapa kuma bener arutsü imlar. Iba sentong nung tanganütsübo maket saka ochi o ka School Education department nung Additional Director Razouseyi-i metetdaksüba, " Nagaland nung azungtsü aser zülutsü metetba nisung noklang nung shilem tir (80%) dak tema atur, saka asenok libalirobo tamajungba akümer aser Naga nung loktiliba nung ochimashiba mapa agi süngogo," ta ashiba o liasü. Iba o jagi asenok ajak khen anener bilemdangtsüsa akümer. Education tetezü nisung ka taküm nung tajung inyaksü shisatenük lapoktsüba lir. Anungji, kodang Education ajanga asenoki azungtsü aser zülutsü meteta kümdir, asenok temang, shisatsü aser tanüla jenjang tajungba kuma anepalutsü angatetsüla. Kodang nisung ka kecha memeteti aliba azungtsü aser zülutsü meteta kümdir, idak nung jagi tenzüka peisasa shisatsü tuluba bushiloka nübortem asoshi nungdakba teyari bener arutsü, anungji nisung nem azungtsü aser zülutsü sayuba aser angazükdaksüba education jagi asenok nisunga aser loktia tajungba kümdaktsütsüla. Ajisüaka, Nagaland nungbo nisung 80% dak temai azung zülü meteta akümdangang, nisunga aser state-a tamajungba akümer süra, tamasayongi Nagaland nungbo azung zülü metettsüsa education sayu metenzükang tajungba süla na (?) ta bilemtsüsa atalokdagi. Alemli asen limai education maru, asen tsüraburtem azung zülü memetetba mapangbo, parnok sobaliba maparen ajak nung kanga ochishia lia aruba otsü asenoki jembir. Ajisüaka, tanü temetetba putu nungang asenok ochishia jangratema alitsü melen asenok yimya mapa ajak nung tamajungba aser ochimashiba akümba ya school nung sayuba dak aket asü mesüra kong shibai sayur (?) ta bilemdangtsüba kanga tongtibang kümogo. Iba amaisa sayutet nungbo, tang aliba kaketreju ajak shibanga yur mesayuang tajungba aser sayudi süra tang sayuba sayuyim ya aika kenyongi melenshitsü nungdaker. Tanü Nagaland kaketrejitem nung sayuba sayuyim melenshitsüba, talisa, tesem ana nung reprangteter. Kaji, kaketshir shiai alima nung aliba nükjidong meteta ochishir taküm kaka akümtsüsa sayutettsüla aser ano kaji, pei dak aketba sempet aser tejangraba meteta kaketshir shiaji peisasa nübortem nungdak apiteta mapa inyaker kaka kümdaktsütsüba asütsü. Tang kaketrejitem nung sayuba sayuyim nung temulung masüba kaji, kaketshirtem nem tarutsü nung tain kümer ochishia nübortem asoshi mapa inyaka alitsü sayutsü melen English oshi aser akhi chuba yimlitem otsü angazükdaktsütsüba nungang temulung tagütsüba amai sayur. Ano, tang tesayudak sayuyim ajanga anisüngzük masü tebilemtsüang bener arutsüba, kaketshirtem nem shisa tasen agüja bushilokdaksür masü saka tazungba degree angutsü azünger amai züngdaksür. Ibayongji, tanü azung zülü ashirtem rongnung tazungba degree tulu abener aika lir. Parnoki English junga jembitetter, akhi yimten yimlitem otsü meteta lir, nisunger jakla yimya aser tebilematema tereprang nung reprangtetsüsa temetetba lir, saka teinyaksü mapa maka, English aser yimten yimli otsü kisüngi mapa meyanglutetter aser tagitsü rongsen kuma mejembitetter. Aji oda, tzü mopong wazüka ayutsübo jembir saka tangatetba magütsütetter. Joko, asenokia item timtem aser takoksatem yabo reprangtetter melennütsüka ser nung, asenokia memelentetter, kechiyong asenok dak iba tashitemet kolokji mali. Ajisüaka, asenok tia ajung, tangbo linük ajunga nung school nung sayuyim tasen, New Education Policy, latetja lir. Iba sayuyim tasenba sentong nung kaketreju nung kaketshirtem dang tetenzük nungi tetsü oshi sayutsü aser teka mapa ka mesüra kabosa angazükdaktsütsü laletja lir. Iba denji repsema asenoka asen nungdak yari kaketshirtem ajak ochishir senso tajung kaka kümdaktsütsü asoshi sayuyim balaka alitsüla, kechiyong kaketshisatsü sayutsüba yabo center aser state na prongla kasasa khuret lir. Joko, Nagaland nungbo tazungba degree kija agütsüba kaketreju masü saka ochishir adokdaksüba aser mapa inyaker kaka kuma sayutetba school-ang nungdaker. Item school-temji asenoki lapoktetsü aser item school-tem nung tesayurtemi anir, sayuba ama ochishir, linük meimer, mapa inyaker senso tajung kaka kuma alitsü tenzüki.

## Arok ajungtsü atema mebensemi dang bilemdangtsü olen kar

Dr. Imti John, H.O. Dimapur, Nagaland

*(Yashi adok nungi...)*

Ochi mulungjang agi Linük Nebur tenzüksüpur atenshir Pa O nung ajemdaker nokdaksü aser inyaksü mapang tongja tongogo no! Asen Kin yanglushtisü Sensopur ajak khuret lir. Pei taküm yanglushira asen Kin teraksa yanglushitsü temela ibai rara tajung lir. Ochi tamangertem asoshi Nok/Nü ji Temeshi tanela ain. Temeshi Tanela Ain den nokdaker telokji shingai-a, kechai-a nokdangtsü makok. Ni ama meshimejunger aika, tantsür-tambur aika, kinük nebur aika-item yagi jeba sarasademba asen Tsüngrem menden tongdagi. Kenübosa asen lima nung ohi lenir atoktsü. Ochi tamanger ajak atenshitsü mapangji dang.

Kanga dang süoki yia shisadangangju, asen Ao-kin tia-ji, senji-senja odarko! Kika süchir dang süner, Nokinketerbo mali! Mapa bushritem nongzüteber/ pakzüteber, saka mapa aser len-mang tuyurbo mali! Ochi indang jembir jenti, ochi nongiterbo mali! Menden rakteber jenti saka menden yanglurbo mali! Tsüngrem tenzüker aika, Tsüngrem mapa inyakerbo atamatar! Pastro aser Reverend aika, saka item rongnung temeshiba tashi (Power of Holiness) aketerbo mali den saku!

Tsükong ajak ya Ao-lima. Ya ajaki Arok-senmang ama aja-ayangti. Kanga meimtebdi. Ner yimer, ozü yimer, par yimer ta kangabo mebensei Aor tsüngda akenalutem aser nükla süteb züindaktsüdi. Asa-sendong odia lemsateba aseni anir Naga lima tejakleni odaktsüdi.

Teputeb aser meputeb ya na aser kü dak keta lir. Kin-kidong jangjangjaa metetba, asungteta litebdi, saka Aor-kidong balala telongjem ya kangabo alakteta mesabutebli. Nisung kar-i pei wadang nung takok angudang/ temaba jenjangi atudang kin-kidong mesüra tebou semchir tenüng nung ta mejeta metuloktsüyong-a yimer ajak telongjem mesüra Tsükong (range) mesüra Ao-sendeni loki nem takok konang bentsür arutsüba tepela tetushi zülü/paper nung atoktsübaiangsa tajungtiba aser teperiba asütsü amai nibo bilemer-kechiyong Aor-bo yim ka nungi dang prokshiba yimtem/Tsükongtem: Ao-yimli (Aoness).

Tapayutsü asen Ao-kin ariena yangdaka lir! Ao-Kin ya Naga Kin-tem nükrangdong aser ibai Tsüngremer sendong lir. Saka tanü-bo Külakettem, ochi mashi, tenük merem, anemsü, meromeru- item yagi naibangogo! Arung, nüktzü yemti, mulung raksadi. Aseni anir atemzükba (declaration) sendong temji süoki ia bilemdangangju-tamakok, tamakok dang! Aji oda, asen Ao-Kin labijok/ labisang kümogo! Aseni anir atemzükba aser ayongzükba sendongtemji takok angutsübasaakodi! Arung, asentenshir, mulung ka sür -Ochi rongsen, taküm aser mapang tenlaa nokdaki; ya meinyaktetra Tsüngremi asen Kin sentokatoktsü! Aji asenoki metizüktetsü!

Onok tama, nenok tesü, yimkümer, yimküm memenüber, tayim-tanar, nübener, kijasor, Yimtisanger, Nokjusanger ta nemja/luja/ mezüngmeshia bilemba, jempiba-item yagi shiba-bo mesüra kechibo ajangzüker? Asenok (meimchir) ajak Tsüngremi alimai yok. Yimer ajak Senso ka dang. Süngyanglu külemertem (Hindus) angüngla "Upper/ Middle/Lower Class" majung ta angateta tajungleni melenshiba mapangakorl; arungma, asenok Ao-kin sanger; Khristar Osang perokshiba 'Mednti Kin' ta angateta tulur/tilar/takar/sensaker ajak telong tnteter asen Naga lima/Ao-Kin yanglushidi. Litua lir oatoktsüba takümtem ya kanga dang keta senteba litebdi.

"Adianutem, asenoki tasa-tabung balala amshia nisung peladaktsütsü aser puatsü sendong dangbo meyanglui asen Teyanglur Taküm Tsüngrem mulung chidaktsütsü pa mapa inyakdi aser pei dang nungibo neburtem/ lokdi tiajiang tali süoki ia bilemja nokdaksi".

"Asen mapa aser mulungjang Tsüngrem tsüngdang shtiak lira, menuaka/ mapang atsülangaka takok aser temoatsüji arulanglang ta angateta kecha nung-a temulung makai telima".

"Neburtem tsüngda teyariteb aser temeimtebji asenok tashi (our power) aser Tsüngremer tashi (God's power) ji asenok Nok-Nü (Weapon)".

"Tsüngrem dak liang, Tsüngrem den jajang, Nebur asoshi liang, süra metetsümongabo nai tai memenatsü aser kecha, shiang-a nemea memesüzükdaktsütsü."

**Naga lima asoshi Ao-Kin jatetba, taochiba Tsüngrem, onok dak nungi nü temeim taochi yimlibilem tagienma. Onoki nü dang taitok meshir. Jokurla ozü Ao-Kin-i Na mejashidaktsütsü.**

**AMEN**

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Israel nung St Peter's Tenla ki kum 70 sülen tanaben lapoktsü



Jerusalem kubok Jaffa nung aliba St. Peter's Tenla Ki noksa nung angur. 1948 kum iba Tenla ki shibanga liasü saka iba Tenla ki yanglushia tanaben lapoktsü.

**November 12, 2021:** Israel nung aliba Anglican Arogo Tenla ki ka kum 70 tejaklen shibanga liasü saka iba Tenla ki yanglushiba sülen tanaben lapoka tekülem sentong agitsü.

Jaffa nung aliba St. Peter's Tenla ki ya 1948 kum Arab-Israel rara mapang nung shibanga liasü aser tawaka tashi iba Tenla ki kanga mejungi raksar liasü. Iba tesem nungji alirtemi iba Tenla ki tanaben yanglushitsü atema aiben mepishia aruba sülen taküm September ita nungi tenzüka iba Tenla ki yanglushi tenzüik.

Iba Arogo nung tongti putirji Rev. Kevin Cable asütsü; taküm May ita nung St. George Tenla kidang Jerusalem nung tongti putir, Rev. Hosam Naoum-i Kevin putir asütsü atema meshitetsüba sentong ka agiogo.

Kevin Cable ya tamalen UK nung aliba St Katharine aser St Nicholas nung Vicar inyaka liasü. 2018 kum November ita nung pa aser pa kinüngtsü Jen na leniba nung telok kati Israel semdangba mapang St Peter Arogo nung pa putir asütsü atema shima liasü.

Kevin Cable aser pa kinüngtsü nati Jerusalem nung

ita asem monga Temeshi Lima nung alitsü jaklababa den külemi Ibri oshi angazükba sülen September ita nungi Jerusalem nung alir.

Osangbener den jembidang pai, "UK nung künati ozü meyong ajak yokdokadok aser suitcase trok dang bener Israel-i aru. Ministry mapa tenzüka iba Tenla ki tanaben yanglushiba nung shilem agir," ta metetdaksü.

Arogo nungi volunteers, Anglican nung aser Tel Aviv anasa aliba embassy staff tem den külemi Kevin Cable-i Tenla ki moapu aser temeket nung ai aser jana tama merükteta liasü.

"Iba Tenla ki kichiba ajak raksaogo aser ibaji ajanga koto ro aika Tenla ki telungi aiter, tesep yanglur aser Tenla ki raksatsür. Kichibatemi aina tajung agi melentsü," ta pai metetdaksü.

Tenla ki sülen Arogo office tama yanglushitsü aser iba nungji Pound sen 37,000 shi indoktsü. Tenla ki yanglushiba densema iba project atema Pound sen 260,000 shi nungdaker; iba atemaji tang Jerusalem nung Arogoi tenla bushidar.

Tarutsü nung Tenla kidang light wiring asütsü, tsüngbang

tejen agizüker tasen melentsü, menden densema furniture ajak tasen melentsü aser kimalen lungro dak sendakba maparen kar inyaksü.

Iba Tenla ki ya 2022 kum mesüra 2023 kum tetenzüklen tashi nungbo lapoktsü imlar. Ajisüaka Arogopurtem taoba ita nungi tenzüka Beit Immanuel Centre nung hopta shia Honibarnü tekülem sentong aser Bible study agir. Yangji alir timbaka Tel Aviv nung aliba embassies nung Anglican ketdangsertem lir.

Kevin Cable ya tang Mission to Seafarers atema chaplain teinyakdak aser Tel Aviv nung bendanger ketdangsertem tenzüksü atema pa nem mapa lemzüka lir.

Jerusalem nung tongti putir, Naoum-i, "Jaffa nung St Peter Arogo Tenla ki tanaben lapoktsü aliba atema onok kanga pelar, koba ajanga Jaffa-Tel Aviv metropolitan area nung Yisu Khrista osangtajung sangdongba renloktsü. Onokisa nenok dang Tenla ki tanaben yanglushiba maparen nung Kevin aser Jen Cable na den yariteptsü aser sarasademtsütsü mepishir," ta metetdaksü.

## Haiti nung pastor ka kshettsü merang; par jabaso ang kshaset

**November 12, 2021:** Haiti yimtiba, Port-au-Prince nung aliba Evangelical Theological Seminary-i sangdong ka ajanga, Seminary nung student coordinator aser Pastor, Stanis Stifinson Honibarnü par kibong den külemi Croix-des-Bouquets ajanga kidangi aoba mapang nung prangpong amer telok kati amak, ta metetdaksü.

Iba tatalokba nung pastor Stanis'er jabaso rongnung ka kshaset aser pa den par jabaso tambusang na injang agi yiru, ta parnokisa metetdaksü.

Ano külen U.S. State Department-i America nung dang tangsa Haiti linük toktsür arung, ta sangdongogo. Tang Haiti linük nung totzü agi kanga

anünger aser rara adoka aliba mapang nung US-i sensotem dang iba linük toktsütsü mepishir.

Haiti linük nung tang tashi America nung missionary 16 densema missionary 17 tang tashi telok kati pua lir, aser parnok chioktsü atema dollar sen million 17 akhanger.

Christian Aid Ministries-i America nung missionary tem atema maneni sarasademtsüdar. Parnoki ashiba agi, tang Haiti linük tesadang kabo prangpong amer telok balala ket nung lir.

Bodhbarnü (November 10) Haiti nung aliba US Embassy-i sangdong ka ajanga, "Department of State-i US sensotem dang tangsa Haiti linük toktsütsü atema sentong

yanglutsü mepishir. Tang aliba security tensa apir US sensotemi ainlen senzüba mapa kanga kümdangtsüla mesüra Haiti nungsa liaka kanga kümdangtsüla," ta metetdaksü.

"Totzü agi kanga anüngba ajanga rongdak mapang nung nungdakba service balala junga mangutsü, item rongnung bank maparen, sen transfer asüba, medical teyari, internet aser telecommunications, public aser private transportation tsütsü timtem ajangshitsü. Commercial tayimtsü senzüba anenra iba linük toktsütsü atema U.S. Embassy-i Haiti nung aliba US sensotem meyaritetsüa akok," ta metetdaksü.

## ANO GO ABEN TSÜNGREM DEN

### Jungtepshia liang

*Tenladak madak ne tenla tokjang aser oang, aser tamasa ne adianu den jungtepang, ajiser arung aser ne tenla agüjang. Mathi 5:23,24.*

Ne adianutem den tsükchitepa yur tenla agütsübaji tagizüktetsü tenla masü. Yisui Pa sülen anidakertem dang kar anema langka ta lira parnok den jungtepang ta ashi. Alima telemtetba ka yur jungteptsü bushir Khristantemi kechi südir süaka jungteptsüla.

Nenoki ashir, "Saka nenoki ashir pai ni koda yirutsü nai memetet! Onok tesendaktep jungshiteptsü kuli maka." Mesüra, "Ni merangogo saka lai au masü." Jungtepba alitsü asoshi Yisui talila o meinoki. Ne tsükchir dang meimang ta dang Yisui ashi (Matt. 5:44). Pai na rishikangshira pa dang meimang. Pa atema sarasademjang ta dang ashi (Matt. 44). Yimjak nung na mak südaktsüra nai meyipa telangzü (t. 39). Kari ne dang langka meshira talila agüjang (t.41). Alimai sayur "Na atema liang." Yisui sayu, "Ne sasa tila kumang."

Na ajemzüktsütsü ta alimai tekümdangtsü agütsür. Yisui Pa nütsüngtem dang junga benshitsüla ta mebilem saka parnoki ajak den jungtepa alitsü bilemstü. Nisungi pa dak metsü metsüloktsü aser kangki nung angenlok. Pai kechi langzü aji asenok yimya (model) lir: "Oba, parnok dang tai tokang, kechiaser parnoki kechi inyaker aji parnoki memetet (Luke 23:34).

Idakji maneni ozüng raksaba lira aser tashi mangaba lira, ibaji jungteptsüla. "Ni mapatem shidak inyaksü meranger, saka kü tsükchirtemi magizüker" ta asen sasa bilema asenoki triplema alir. Tsüngrem Oi "Jungtepba alitsü merangang" ta mashir saka, "Jungtepang" ta ashir. Kar den na yimjung nungdaka lir asü? Süra Tsüngrem ashiba ama inyakang.

## YouVersion Bible App install asüba million 500 jungogo

**November 12, 2021:** Tan hopta Bible app YouVersion-i alizüng tasen ka tongtetogo; alima tesem ajungalen iba app install asüba million 500 jungogo, aser tang mezüng tamangba yimsü dak sendakba app ajanga iba alizüng tongteter.

Iba app ya 2008 kum tenzüka liasü aser iOS App Store nung angati apps 200 rongnung densema liasü. Kobi melii Bible app YouVersion ya kanga nungtugu aküm aser iPhone (2007 kum mezüng) aser iPad (2010 kum tenzüka) nung download timtiba asüba Bible app aküm.

2021 kum Laishiba tapu billion 64 bo züngogo mesüra angaogo, aser ibaji 2020 kum den medemdangra shilem 21 agi timba aser 2019 kum den medemdangra shilem 56 agi timba lir, ta iba app yanglur Life.Church-i metetdaksü.

Tang tesüsa iba app install asüba million 500 jungogo.

"Nisung karibo Laishiba ya mapet aser Lai azüngertem ajema akümer, ta jembir ajisüaka million 500 ben download asüba ajanga parnoki jembibaji tai ta kuli sayur," ta YouVersion tentetsang, Bobby Gruenewald-i metetdaksü.

"Maneni Laishiba ya tapet aser nisung ka melenshitsü atema tashi tulu lir. Ibayongji iba alizüng atongba atema onoki tepela nung benjungteper. Alizüng ka atongba agi dang masü saka install asüba shia nisung kar tamang aintsü aser Tsüngrem anasa aotsü maongka anguba temaitsü sayur," ta paisa metetdaksü.

YouVersion app nung oshi 1,760 nung Laishiba version 2,600 densema lir. YouVersion team-i Laishiba oshi tasen nung meyipzükbaji tekaratiba nung iba app nung inoktsür; iba atemaji onoki publishers aser Bible societies dang pelar, ta Arogo website nung shia lir.

"Iba app ajanga Tsüngremi alima tesem ajungalen mapa inyaker," ta parnokisa metetdaksü.

Gruenewald-i, "Alima nung linük ajak nung nüburtem ket tongtettsüsa aser nisung million aika taküm melenshitsüsa iba app kanga inogo. Iba App atema onoki mangdang tasen yua lir aser pastor tem den Arogo lenirtem junga tenzüktetsü atema 2022 kum onoki ano features tasen aika tenzüksü yongyar," ta metetdaksü.

**OLONG PAITEP # 5995**


1		2		3		4	5			
				6						7
		8								
9				10		11				
			12					13		
						14				
16						17				

- |                            |       |                                |       |
|----------------------------|-------|--------------------------------|-------|
| <b>TIPIEN</b>              |       | <b>LANGTSÜNGLEN</b>            |       |
| 1. Nisung jenti            | - (5) | 1. Tenük telong                | - (9) |
| 4. Tsük rudenba            | - (5) | 2. Committee dang ajar         | - (5) |
| 6. Temzüng tesashi         | - (5) | 3. Yagi ki okdoker             | - (7) |
| 8. S_ _ _ i                | - (3) | 5. Yim lenmang                 | - (5) |
| 9. Nisung rongnung telemsa | - (3) | 7. Temoatsü keter meyipa aruba | - (9) |
| 10. Anogoshi               | - (4) | 11. Kanga junga menemba        | - (7) |
| 12. Ajanga aor             | - (4) | 12. Kenyongi majinü            | - (5) |
| 13. Tsük rizüngdak         | - (3) | 13. Rong kanga tulu            | - (5) |
| 14. Tebang nungi adokba    | - (3) |                                |       |
| 16. Süngdong tatembangtiba | - (5) |                                |       |
| 17. Meputep                | - (5) |                                |       |

**OLONG PAITEP # 5994 TELANGZÜBA**

- |                                  |  |
|----------------------------------|--|
| <b>TIPIEN :</b>                  | <b>LANGTSÜNGLEN :</b>                  |
| 1. Tanga, 6. Wara, 7. Rajang,    | 2. Anga, 3. Yabang, 4. Tarok, 5. Orak, |
| 9. Anük, 10. Jenjang, 11. Alar,  | 8. Ainer, 9. Anema, 10. Jabili,        |
| 14. Ngashi, 15. Nala, 16. Mechi. | 11. Among, 12. Miim, 13. Anem.         |

**Noksa nung meputepi aliba 10 bushiang**




**TANÜBO NAI LANGZÜANG**

Q. Tawa IRCTC ajanga tenzükba Circuit Train ji koba?  
 [A] Shri Ramayana Yatra Train [B] Mahabharata Yatra Train  
 [C] Velankanni Yatra Train [D] Dargah Yatra Train  
 (Taruba adok nung onoki langzüsü)  
**YASHI ADOK TELANGZÜBA : USA**

**AO OSHI ANGAZÜKDAK:**  
**TANÜ ANGAZÜKTSÜBA OJANG**

**Lensük**  
 (v) süngdong laodaktsü ( cut down of trees)  
 \* Kübui alu achidang süngdong tuluka lensük.

**Lenten**  
 (n) lisatemedem, longpang aser tenem masü (plain area)  
 \* Lenten nung tsümartem alir.



**NAI-A YA METETTER MA**

- October 2021' Nung Sayaba Kensep Tasen Kar:**
- |                          |                                 |
|--------------------------|---------------------------------|
| Lana Del Rey             | - Blue Banisters                |
| James Blake              | - Friends That Break Your Heart |
| PinkPantheress           | - to hell with it               |
| Coldplay                 | - Music of the Spheres          |
| Young Thug               | - Punk                          |
| Don Toliver              | - Life of a DON                 |
| Self Esteem              | - Prioritise Pleasure           |
| Adele                    | - Easy On Me                    |
| Limp Bizkit              | - STILL SUCKS                   |
| Megan Thee Stallion      | - Something for Thee Hotties    |
| Tony Bennett & Lady Gaga | - Love For Sale                 |
| Black Country, New Road  | - Chaos Space Marine            |
| Tori Amos                | - Ocean To Ocean                |
| Elton John               | - The Lockdown Sessions         |
| Lil Wayne & Rich The Kid | - Trust Fund Babies             |

**SUDOKU # 6036 TELANGZÜBA # 6035**

9				2	8	5	3		7	2	3	6	5	4	1	8	9
	3	1	5		9		2		4	6	1	2	9	8	3	5	7
	2	7	4	3			6		8	5	9	3	7	1	4	6	2
							7	8	1	9	5	4	8	2	7	3	6
4	6		3			2	1	5	6	7	2	1	3	5	8	9	4
1			2	8	6				3	4	8	7	6	9	5	2	1
6	8	4	9			3		7	9	3	4	5	1	6	2	7	8
	1		8		3		9		5	1	6	8	2	7	9	4	3
	5				4	1			2	8	7	9	4	3	6	1	5

**OJANG LUTEP # 5582**

HEKN	:	<input type="checkbox"/>
NNUG	:	<input type="checkbox"/>
JAAK	:	<input type="checkbox"/>
IAKTNYSÜ	:	<input type="checkbox"/>
ANMMEERGI	:	<input type="checkbox"/>
KA	:	<input type="checkbox"/>
NGNU	:	<input type="checkbox"/>
LTMUUNEG	:	<input type="checkbox"/>
TSGÜÜRA	:	<input type="checkbox"/>
KINAANYG	:	<input type="checkbox"/>

**OJANG LUTEP TELANGZÜBA # 5581**

**TANGAR TIMTEM ASER KHURET MEMETETI PARNOK  
 KHENYONGI AITSÜTSÜ NÜNGDAK MADOKER**

**TAN HOPTA ATEMA - KOMA SÜLA ?**

Q. Akhidang ama, ABAM kübok lanurtem ya küm shia lanur mungdang (Youth Convention) ya Impur nung dang melii, tagizüker dang lira, yimtsüng aser town arogotem nung among nunga koma süla ?

### AWE Program kubok NE India nungi tetsür entrepreneurs 25 yarir



**Kolkata, November 12 (Agencies):** Global Entrepreneurship Week (GEW) dak sendakba nung U.S. Consulate Kolkata-i Shillong nung amenoka aliba Asian Confluence den senteper Northeast India nungi tetsür entrepreneurs 25 atema anogo ananü boot camp ka ayongzüka November 12-13 anogotem nung American Center, Kolkata nung agidar.

Nagaland state tem nung tang mezünpur entrepreneurs aser business inyaker 150 shi yariogo. AWE sentong nung jembidang Consul General, Melinda Pavek-i, "United States-i entrepreneurship ajanga tetsürtem nem tashi agütsüner aser tetsürtem kasa züngshitsü aser maparen ajak nung tetsür dendaktsüsa atema inyaker," ta metetdaksü.

tetuyubatem shidak bentshia Dimapur, Shillong aser Imphal nungbo workshop asem ayongzüka agiogo. Tang mezünpur northeast nungi entrepreneurs 25-i business pitch session nung shilem agitsü aser ibaji jury panel kati tendangtsü," ta Melinda-isa metetdaksü.

U.S. Department of State's Bureau of Education & Cultural Affairs (ECA)-i sponsor asüba Academy for Women Entrepreneurs (AWE) program ya alima nung linük 50 dak tema nung akar aser coronavirus wara liaka tetsür entrepreneurs 5,000 atema sentong katsüogo. U.S Consulate General Kolkata leniba nung AWE program ya tang mezünpur India nung ayongzüka akar. Parnoki University of Arizona indang Dreambuilder course ajanga online education agüja Arunachal Pradesh, Assam, Manipur, Meghalaya aser

"Tang tayongzüka aika lir, saka asen tashi sayutsü aser tesendaktep yanglushitsü atema asenok asoshi iba ya maongka tajung. Consulate Kolkata nung onoki item program ajanga asen region nung entrepreneurs yaritetba atema nüma atanger," ta metetdaksü. Iba program ya yaküm November ita nung tenzüker aser tang tashi nung tetsür entrepreneurs 80 nem Dreambuilder certification agütsüogo. "Iba program ya online ajanga agitsüsa aküm saka onoki coronavirus wara anema

Shilem tajungtiba agirtem nem seed funding agütsüsa aser/mesüra sangküm January ita New Delhi nung aliba American Center nung Nexus incubation program nung shilem agitsü atema maongka angutsü. U.S. Consulate General Kolkata-i November 19 nü tanabuba AWE agitsü aser iba nungji Bihar aser Jharkhand nungi early-stage entrepreneurs 75-i shilem agitsü. U.S. Consulate Kolkata, Asian Confluence aser AWE nung tanga partners-i maneni East aser Northeast India nung entrepreneurship tsütsü tetsürtem yaria maongka agütsüsa aser US Mission-i nungitba program balala katsütsü.

### Taruba küm 10 tsüngda India nung yimti karbo tzü agi metsüngbangtsü

**New Delhi, November 12 (Agencies):** Climate change tebilemstü ya atangji, kechiyong temperatures kanga tali akümer aser rürjep tulu yimsaa aoe, koba ajanga züyümkümlen aliba yimti aika tzü agi metsüngbangtsü.

trok anogo shia nemzüka alur, ta kasa report nung shia lir. Climate change tebilemstü atema meinyakra taruba küm 10 tsüngda India nung yimti pezü tzü agi metsüngbangtsü; mezüngbuba nung climate change ajanga India nunger rongsenkettsüng yimtiba, Mumbai tamajungtiba kongshitsü. Mumbai yimti shilem 65 jungnüa tzü agi metsüngbangtsü, ta parnoki metetdaksü. Ano 2050 küm tashi nung Mumbai nung tzü level kanga tali akümtsü aser Mapusa, Chorao Island, Mulgao, Corlim den Dongrim tamajungba kongshitsü.

Tang alima nung 'climate change' atema tebilemstü kanga akaba mapang nung Intergovernmental Panel on Climate Change (IPCC)-i India densema linük aika dang tekümdangtsü osang metetdaksüogo. Tangbo mapang shia climate change ajanga tzü metsüng lendong atalokba, tzünglu sashia aruba ajanga ayong nung tzü mobanga ayimba aser tzüsü tali akümba ajanga tzünglu maruba kanga bulua ataloker.

Tanabuba nung West Bengal yimtiba, Kolkata-a climate change ajanga mejungi kongshitsü, talisa yimti kubok Baranagar, Rajpur Sonarpur aser Howrah temeket nung aliba Santragachi, Balitikuri tesemtem tzü agi metsüngbangtsüa akok. Climate change ajanga Tamil Nadu nung Chennai tamajungtiba kongshitsü, iba dak alia tzü level tali atuba ajanga Chidambaram, Mahabalipuram, Kalpakkam, Marakkanam, Chunampet, Thiruporir aser Velachery ama züyümkümlen aliba tesemtem tzü agi metsüngbangtsü, ta kasa report ajangasa metetdaksü.

IPCC report ajanga, India-i tangsa climate change tebilemstü onük atema inyaksüla, mesüra climate change ajanga linük nung tsüngsang-mopung dak sendakba lendong tulu ataloktsü, ta metetdaksüogo. Satellites aser ground equipment nungi data aser computer simulations amshia IPCC-i sea-level asadanga osang metetdaksür. India-i climate change atema rondak süa inyaksüla, kechiyong India nung züyümkümlen aliba yimti



November 12, 2021 nü Mumbai nung ED ketdangsertemi taoba mapang Maharashtra nung home minister, Anil Deshmukh special court kati anir aoba noksa nung angur.

### India nung anonisung 12,516 dak Covid putet aser 501 asü

**New Delhi, November 12 (Agencies):** India nung ano nisung 12,516 dak Coronaviurs putet aser tang tashi nung linük nung nisung 3,44,14,186 dak iba tashidak putetogo, ta Hokolbarnü ministry of health & family welfare-i metetdaksü. Linük nung ano iba tashidak agi shiranger 501 süogo aser tang

tashi nung India nung iba tashidak agi nisung 4,62,690 süogo. Tang linük nung coronavirus agi teshirangdakpur 1,37,416 dang kümogo aser tesüiba ghonda 24 tsüngda coronavirus agi shiranger 13,155 anepba densema ajak senteper 3,38,14,080 anepogo. Tesüiba ghonda 24 tsüngda sample

11,65,286 tendangogo aser tang tashi nung sample ajak senteper 62,10,67,350 tendangogo, ta Health Ministry-isa metetdaksü. Tesüiba anogo ka tsüngda coronavirus vaccine dose 53,81,889 agütsüogo aser Hokolbarnep 7:00 ako tashi nung India nung vaccine dose 1,10,79,51,225 agütsüogo.

### India nung Afghan atema senden amenba pelaa agizüker: Taliban

**New Delhi/Kabul, November 12 (Agencies):** Tawa New Delhi nung India densema linük 8 nungi National Security Advisors (NSAs)-i 'Delhi Regional Security Dialogue on Afghanistan' senden nung shilem agia liasü, aser iba dak sendakba nung Taliban teloki, Delhi nung Afghan tensa atema senden amenbaji onoki pelaa agizüker, ta metetdaksü. Taliban-isa, Afghanistan nunger liji shinga anema mamshitsü, anungji alima shisabulutsü menüngdak, ta metetdaksü.

agizüker. Yimsüsüba ajungtsü atema onoki mera agia inyakdar aser Afghan nunger liji shinga anema mamshitsü, anungji alimai shisa mebulutsüla," ta metetdaksü. Yimtenren asadanger mongin, Sayed Haroon Hashimi-i, "Alima nung linüktemi parnoki melungba inyakdaksütsü atema Taliban den jembitsü meranger, aser item ama senden ajanga Afghanistan atema tajung kabosa adoker," ta ashi. International relations analyst, Sayed Hakim Kamali, "Afghanistan atema India nung amenba sendenji kanga junger, kechiyong Afghanistan nem teyari agütsüba linüktem rongnung India densema lir aser India-i Afghanistan nungita yaritsü jangrar," ta ashi.

Taliban-isa, Afghanistan nunger liji shinga anema mamshitsü, anungji alima shisabulutsü menüngdak, ta metetdaksü. Brihostibarnü Afghanistan foreign ministry nung otongdar, Inamullah Samangani-i, "India nung amenba sendenji Islamic Emirate (Taliban)-i pelaa



November 12, 2021 nü Sriperumbudur nung Tamil Nadu Chief Minister, MK Stalin-i tzü metsüng agi kongshiba nüburtem ajuruba noksa nung angur.





# Jalukie CHC nung SAANS lapokba sentong agiogo



Peren, Yimpoksüi/November 12, 2021: Jalukie CHC nung SAANS lapokba sentong temer sülen shilem agirtem külemi tangokba noksa ka yangi angur.

**Peren, Yimpoksüi/November 12, 2021 (TYO):** Hokolbarnü, Jalukie CHC nung District Health Society, Peren-i Social Awareness and Action to Neutralise Pneumonia Successfully (SAANS), Peren lapokba sentong ayongzüka liasü, ta sangdong ajanga metetdaksü.

Iba sentong nung, Dr. Hedunkiebe, DVBO (NVBDCP)-i okila jembia. Dr. Hedunkiebe-i ashiba agi, SAANS mapatong kübok, Sorkari 2025 küm tashi nung pneumonia ajanga taküm samaba ajemdaksütsü nükjiong lir.

Pai, tanur nem tetsü mamatzü junga yongdaksüba, PCV vaccine, 'child morbidity

& mortality' ajemdaksütsü asoshi lokti shilem agitsü indang tongtibangtem telok den lemsatepa liasü.

Dr. Hedunkiebe-isa, SAANS indang nükjiong aser mapatong aser meratem agitsü indang nung jembio.

Dr. Solo, MO, Jalukie CHC-i, pneumonia tashidak indang temaitsü lemsatep liasü.

Kasa sentong nung, EAC, Ngwalwa, Tsenthungo E. Ngullie-i jembia liasü. Tsenthungo-i, health service maparen takok ngua amenoksü asoshi, bendanga agüja aser tejangraba nung inyaksüla ta health worker tem ajungshiogo.

Pai ashiba agi, maparen takok ngua bener aotsü asoshi

teinyaker tsüingda amalitepa aser tesendaktep tajung alitsü kanga tongtibang.

Pei nem nüngloktsüba maparentem khuret bena inyaksü asoshi pai ASHA ajungshia liasü.

Iba sentong nung Mathiukingliu, ICTC Counselor menden liasü. Sentong nung shilem agir ajak nem IEC osettsüsettem angati lema agütsüogo.

Maneni, Peren district nung SAANS lapokba sentong ya district kübok Health Unit ajunga nung agia liasü.

SAANS lapokba sentong nung Administration, vertical departments aser health workers tem denogo, ta kasa sangdong ajanga metetdaksü.

# MLA Yangseo-i Kiphire nung 'Feed Making Unit' lapoktsüogo



**Kiphire, Yimpoksüi/November 12, 2021 (TYO):** Hokolbarnü, MLA aser DPDB Kiphire, Chairman, Yangseo Sangtam-i, Feed Making Unit lapoktsüogo. CM Corpus fund of Aspirational District program akhüm nung KVK Kiphire Nagaland ajanga iba unit amenoka liasü. Yangseo-

isa "Yingbithongru Livestock Feed" brand indang 'pig feed' (Ak nem agütsüba chiyongtsütem) sayaogo. Iba unit yagi ghonda ka nung feeds seret 500 shi yanglutetter, ta sangdong ajanga metetdaksü.

MLA den Deputy Commissioner Kiphire, T. Wati Aier-i KVK Kiphire ajanga

yangluba IFS aser CM Corpus fund of Aspirational District program akhüm nung yangluba pig breeding unit semdanga liasü.

Iba project kübok, küm pungo atema ak techanu ka subsidised rate nung sen. 4000 agi aluyimer dang ayoktsü, ta Dr. Khumdemo-i metetdaksü.

District atema iba project takok ngua tenzüka atema Yangseo Sangtam-i KVK department dang pelaba lemsatep aser iba project ajanga tajangzüka angutsüpurtem kanga ajangzükdaksütsü ta pai ashi; aser iba project nung jangrabangra shilem agitsü asoshi paisa lanurtem ayongzüka liasü, ta kasa sangdong nung shia lir.

# Mon nung awareness sentong ka ayongzüka

**Mon, Yimpoksüi/November 12, 2021 (TYO):** Principal Director (DSE) & Project Director, NEP- Lighthouse (NECTAR), Shanavas C, IAS-i anir Department of School Education, Nagaland Education Project (NEP) - The Lighthouse (NECTAR) Project Management Unit (PMU) ajanga Hokolbarnü Deputy Commissioner, Mon Conference Hall kübok NEP- NECTAR nung District Level Awareness programme ka ayongzüka liasü, ta sangdong ajanga metetdaksü.

Iba sentong nung, Shanavas-i NEP indang nükjiongtem aser

project components metetdaksüba mapang, NEP - The Lighthouse - Nagaland Enhancing Classroom Teaching and Resources (NECTAR) ajanga Nagaland nung Sorkar School tem nung temelenshi adokdaksütsü nükjiong yur inyaker, ta ashi.


India kübok Northeast tesem nung State Sorkar i.e., Department of School Education, Government of Nagaland ajanga mapa küma inyakba Education Project mezüing asütsü, koba World Bank ajanga iba atema teyari agütsür, ta pai shisem.

State Project Coordinator, Visato Koso-i, 'community ownership', 'investment' aser 'collective management' indang tongtibangtem metetdaksü.

Iba sentong nung, SIS Wakching, Minching menden liasü. DEO in-charge Mon-i tepela anküp o jembia.

Maneni, DC Mon, Thavaseelan K, IAS dak alaka, iba awareness sentong nung, tanga administrative officer, police aser tanga department nungi ketdangsurtem aser lokti tentet aser NGOs balala nungi teshimtet nübutem aruagi denogo, ta kasa sangdong nung shia lir.

# KIBONG KÜMER KÜM 50 AJUNGBA TEPELA



**MR. N. LIKOKLEMBAM JAMIR & MRS. T. RONGSEUNUNGLA LONGKUMTSÜR UNGMA VILLAGE (13<sup>TH</sup> NOV. 1971 - 13<sup>TH</sup> NOV. 2021)**

"KÜ TAOCHI NA ASOSHI TEPERI"

Küm tenem tejakdang  
Temang, Teimla aser Temeim agi  
Sarasadema nena Temeshi kulizüing agi  
Aser Pa temeim nung teka amtepa tsüingsang  
mupong ajak ajangdanga  
Iba alizüing tongtet.  
Nena arishi talang den kodanga merakdangba  
temeim lidakjang ta  
Onok ajak longjemer sarasademtsür.

*Chirnurtem, anükapang, amujar, semchirtem aser temeibatem.*



OFFICE OF THE  
**AO SENDEN**

"Nübur Asoshi" (For the People)

## TENÜNGSANG AGÜTSÜR

Naga senso Mayanger, Ao senso sojasor Wb. Dr. SC Jamir Tsüingremer nükpet maongka nguteta alima lenisüba wadang balala nung takotet lungzüka sütet nung pa maparen dak sakloka India nunger senpet tulutiba rongnung ka PADMA BHUSHAN AWARD alangzüktetba asoshi Aor inti tenüing nung Ao Senden mendenti ajanga tenüingsang agütsür aser pa den tepelaba lemsateper. Pa ajanga Aor dang masü saka Naga nunger rangben tekong songteta tangar matsüingdang noktaktetsüsa pai koba senpet tulu ngutetogo iba asoshi nüma adanger. Tsüingremer maneni lenir nem arishi apulokjang ta sarasademtsür.

Sd/-  
**Wb. CHUBAWATILONGCHAR**  
President

Sd/-  
**Wb. IMTIPOKYIM**  
Gen. Secretary

## ASLB Methodology Sayuyim Takok Ngua Temogo

Taoba mapang sangdonga aliba ama ASLB-i achaayanga agiba Arangtet Tatidang PGDT- 601 nungi temalen aser PGDT temer alir Methodology Sayuyim tanü takok Ngua agiogo. Iba sentong nung o jembir Dr. L. Temjen Jamir aser Dr. Lanurenla tena liasü. Ao Senden AGS Wabong Arentemjen Jamir-i tajungshi aser tepela o jembia aser Finance Secretary Wabong Mapui sentong tetenzük nung sarasadem.

Iba sentong ASLB Secretary-i ania liasü aser iba Methodology Sayuyim sentong nung adener ajak agi 54 liasü.

I Temjen Tzüdir

# Kiphire nung DLCC senden menogo

**Kiphire, Yimpoksüi/November 12, 2021 (TYO):** COTPA Act, 2003 indang section 4, 5, 6 aser 7 mapa küma inyaksü nükjiong nung, Brehostibarnü (11.11.2021) DC Conference Hall, Kiphire nung District Level Coordination Committee senden agia liasü, ta sangdong ajanga metetdaksü.

Iba senden agiba mapang, enforcement team ka tentetsü aser district nung iba team ya flying squad ama achaayangtsü asoshi committee-i lemtet.

Team-i mapang shia

dokantem mita aotsü aser aiblener dang senchi achitsü asoshi telok bangjemtep.

District Nodal Officer, NTCP Kiphire, Dr. N Moa Jamir-i, nüburtem tsüingda tekümdangtsü osang sangdongtsü atema office aser reju ajak nung poster maloktsüogo, ta metetdaksü.

District telungtet nung committee-i "Tobacco Free Institutions" shimtsü aser Statehood Day (1st December 2021) anogomung nung parnok nem certificate agütsütsü, ta paisa ashi.

## Chieneino Brothers aser Mystic Club nati 8buba Kohima District Open Volleyball Tournament kokogo



Kohima, Yimpoksüi/November 12, 2021: 8buba Kohima District Open Volleyball asayamung nung takok angur team anaprongla den tongtibang nübutem aser KDVA ketdangsürtem külemi tangokba noksa ka yangi angur.

**Kohima, Yimpoksüi/November 12, 2021 (TYO):** Chieneino Brothers, Kiruphema aser Mystic Club nati 8buba Kohima District Open Volleyball Tournament kokogo. Iba volleyball asayamung ya Kohima District Volleyball Association (KDVA) ajanga Kohima Local Ground nung ayongzüka liasü, ta sangdong ajanga metetdaksü.

Iba asayamung final (tebur) nung Chieneino Brothers aser Michazou Mima asaya liasü. Men's category nung Chieneino Brothers-i tanabenbuba takok marok angur asütsü.

Takok angur team - Chieneino Brothers-i senpet 50,000 den trophy aser citation agizük. Kasa tetoktepba nung runners-up Michazou Mima-i senpet 25,000 den trophy aser

citation angu. Semi-final nung tamakok angur team ana Kiruphema Youth Organisation aser Dazling Phesama nem sen 5,000 (5,000 each) agütsü.

Men's individual category nung Chieneino Brothers nungi Kethovikho Zenyü nem 'best spiker' aser Michazou Mima nungi Keneiso Tapa nem 'best setter' naroküm agütsü. Tenaprongla nem senpet 2000 (Rs 2000 each) agütsüo.

Maneni, kasa asayamung final women's category nung Mystic Club-i defending champion Elite Sisters Kohima tsükdaksü.

Mystic Club nem senpet 30,000 den trophy aser citation agütsü. Kasa mapang, runners-up Elite Sisters-i senpet 15,000 den trophy aser citation agizük. Semi-final nung tamakok angur team ana - Kezo Town aser Tiema-Khe

Kidima naprongla nem senpet 5,000 (Rs 5,000 each) agütsü.

Womens individual category nung, Rinrichon Kashung aser Mhasivino Kuotsu nati 'best spiker' aser 'best setter' award angu. Tena nem senpet 2000 (Rs 2000 each) agüja liasü.

Chieneino Brothers indang Visaneikho Keziezie nem best coach award (Rs 2000) agütsü.

Maneni, iba asayamung shibangba sentong nung ADC Kohima N Bhavani Sri, alakteta tejaoker ama aruagi dena liasü aser pai asayartem dang bendanga agüja aser meranga inyaksü ajungshiogo.

Animal Husbandry & Veterinary Service indang Deputy Director, Dr Asalie Khezhi-i takok angurtem nem sempet agüja liasü, ta kasa sangdong nung shia lir.

## 'State Level Catapult Competition 2021' ayongzüksü

**Kohima, Yimpoksüi/November 12, 2021 (TYO):** Brehostibarnü (11.11.2021) Directorate of Tribal Affairs, Kohima indang Conference Hall nung Department of Tribal Affairs-i State Level Catapult Competition dak sendakba nung press conference ka ayongzü, ta sangdong ajanga metetdaksü.

Department of Tribal Affairs, GoN, Nagaland Tribal Research Institute ajanga 'State Level Catapult Competition 2021' ayongzüksü aser Ministry of Tribal Affairs, GoI ajanga teyari agütsütsü.

Osangbener den jembiba mapang, Nodal Officer TRI, K. Ongligaku-i, "Azad Ka Amrit Mahotsav" aser Bhagwan Birsa Munda, shiba Jharkhand State nungi

Indian Tribal freedom fighter ka liasü, pa asoba benjongmung shilem ama November 15 nungi 22, 2021 tashi India tesem ajunga nung sentong balala ayongzüksü," ta ashi.

Department of Tribal Affairs-i November 15, 2021 anüngdang 12:00 meta nungi Heritage village, Kisama nung State Level Catapult Target Hitting Competition ka ayongzüksü terenemba lir.

Nagaland State nungi Naga kin balalai iba tetoktepba nung shilem agütsü, kong shilem agir 30 tashi tokteptsü. Iba anogo (November 15, 2021) kasa tesem nung anepdang 11:00 ako nungi 11:30 ako tashi shilem agirtem atema registration lapoktsütsü, ta pai metetdaksü.

Iba tetoktepba nung

shilem agirtemi pei pei kin sobutsü asemtsüla aser pei pei kin indang yangkhu bener arutsüla. Metre 100 tsüngda lijak kashishiba tokteptsü aser temaba jenjang nung takok angur asem nem senpet den certificate agütsütsü. Iba sentong ya Addl. Secretary, Nchumbemo Lotha-i lapoktsütsü," ta Ongligaku-i shisem.

Maneni, Sorkar nükjidong atalokdaksütsü asoshi, Department-i sobaliba saisapong ka shimtsü lemtet aser hopta piyong ayongtsü aliba asayamung atema alakteta lijak kashishiba (Catapult) asaya shim. Department of Tribal Affairs-i Naga lanurtem dang iba asayamung nung shilem agütsü aser aruagi adentsü asoshi mepishir, ta kasa sangdong ajanga metetdaksü.

## U-14 Inter-District Catch Them Young Tournament tembangogo

**Kohima, Yimpoksüi/November 12, 2021 (TYO):** Department of Youth Resources & Sports akhüm nung Indira Gandhi Stadium, Kohima kübok anogo ana tashi ayongba '13th Under-14 Inter-District Catch Them Young Tournament' nung Dimapur district-i takok nguogo (group champion), ta sangdong ajanga metetdaksü.

Iba asayamung nung, Dimapur-i gold 5, silver 3 aser bronze 3 densema medal 11 angu. Peren district-i medal 8 - (gold 4, silver 1 aser bronze 3) aser Mon district-i medal 6 (gold 3 aser silver 3) angu.

Anogo ana tashi ayongba asayamung nung saisapong talisa Badminton, Table Tennis aser athletics - 100m, 800m, long jump, shotput (tetsür aser tebur) asayaogo. Iba asayamung nung medal asaya balala atema medal 48 agütsüo.

Iba asayamung nung, district 12 nungi tebur 89 aser tetsür 78 densema asayar 305 agi shilem agiogo.

'13buba Under-14 Inter-District Catch Them Young Tournament' shibangba sentong nung, DYRS director Akumla Chuba jaoka liasü aser lai takok angur nem sempet agütsü.

Iba asayamung takok ngua agitetsüsa meranga asayaba asoshi lai shilem agir ajak dang pelaba metetdaksü aser iba asayamung nung shilem agiba ajanga asayar ka tajungba kümdaksütsü imlar, ta lemsatop.

Asayar takotet ka ka akümtsü asoshi maneni meranga asayatsüla ta lai asayartem ayongzüka liasü. Iba dak sendakba nung, director Akumla-i, tajungtiba akümtsü asoshi kanga bendanga aser nükla tajung yur asayatsü asoshi kaketshirtem ajungshiogo.

Sports Academy nung shilem agütsü jangra alir asayartem Dimapur kübok academy training nung adentsü asoshi laisa temsüa alir athlete tem pelashishia jaok.

Iba dak sendakba nung nungdakba maparen achaayangtsü atema tejangrartem pei pei District Sports Officer dang osang agütsütsü akok, ta laisa ashi.

**\* U-14 Inter-District Catch Them Young Tournament nung takok angurtem yamai alitsü:**

- Table Tennis Boys singles: 1st place: Shreyan Jain (Dimapur) 2nd: Nisuvi A Awomi (Zunheboto) & 3rd:

Vilavotuo Linyu (Kohima) - Table Tennis Girls Singles: 1st: Kesinuo Dzüvichü (Kohima), 2nd: Meyalila Kichu (Dimapur) & 3rd: Yimtisenla (Tuensang)

- Table Tennis Boys doubles: 1st: Shreyan Jain & David (Dimapur), 2nd : Kethosetuo Khruomo & Mhasevi Mechieo (Kohima) & 3rd: Toinato Z. Assumi & Apuvi Z Aye (Zunheboto)

- Table Tennis Girls doubles: 1st: Yimtisenla & Sangmaitola (Tuensang), 2nd: Pekrusenuo Yiese & Letsonuo Kire (Kohima) & 3rd: Aosen Imchen & Meyalila Kichu (Dimapur)

- Shot-put (boys): 1st: Thujoveyi Swuro (Phek) 8.45 m, 2nd: Minphong Konyak (Mon) 7.54m & 3rd: Nighakivi Sumi (Zunheboto) 6.90 m

- Shot-put (girls): Menuolenuo Alphonsa (Dimapur) 5.72 m, Mary A Konyak (Mon) 5.71 m & Kebayile (Peren) 5.38 m - High jump (boys): 1st: Minphong Konyak (Mon) 1.60 m, 2nd: Lurizo (Phek) 1.60 m & 3rd: Londiba S. (Kiphire) 1.57m

- High jump girls: 1st: Thingpia P (Noklak) 1.21 m, 2nd: Mary A Konyak (Mon) 1.19 m & 3rd: Gloria V Shohe (Zunheboto) 1.17m

- Badminton Boys single: 1st: Esibe (Peren), 2nd : Arkutong (Mokokchung) & 3rd: Khruzo (Phek)

- Badminton Girls single: 1st: A. Ponlih Konyak (Mon), 2nd : Imsusenla Longkumer (Mokokchung) & 3rd: Subenro M Ngullie (Dimapur)

- Badminton Boys Doubles: 1st: Methuithun & Kibangheu (Peren), 2nd : Mughakivi T Zhimo & Hoto H Kinni (Zunheboto) & 3rd: Heloka & Govind (Dimapur)

- Badminton Girls Doubles: 1st: Temennaro & Imsusenla Longkumer (Mokokchung), 2nd : Subenro M Ngullie & Meyisen Longkumer (Dimapur) & 3rd: Christal & Chumdeno (Wokha)

- 800 metre race Boys: 1st: Gaichuipou Pamei (Peren) 2.36.23 m, 2nd: Khaidem Elbert (Dimapur) 2.37.84 m & 3rd: Lanusucha (Mokokchung) 2.57.45m

- 800 metre race Girls: 1st: Vesunelu (Phek) 3.01.64 m, 2nd : Chongsop. P (Noklak) 3.03.19 m & 3rd: Kilungbale Haiming (Peren) 3.07.53m.

## BILEMDANGANG

"Tangar kübok litetbaji nübur madak chuba akümba den saku."